

Doi: 10.56737/2953-7843-2025.06-70

ՏԱԹԵՒԻԿ ՄԱՆՈՒԿՅԱՆ,
Բանասիրական գիտ. թեկնածու, ՄՄ

ՔՆԱՐ ՀԱՐՈՒԹՅՈՒՆՅԱՆ
ՄՄ

ՄՈԿԱՍ ՓՈԽԹԿՈՒ ՍՈՒՐԲ ԳԵՒՈՐԳ ՎԱՆՔԻ ՆՈՐԱՅԱՅՏ ԿՈՆՂԱԿԸ¹

Նվիրվում է Հայոց ցեղասպանության 110-րդ տարելիցին
և մոկսեցիների հիշատակին

ՄՈՒՏՔ

Քաղաքակիրթ համարվող ԻԱ. դարում Հայաստանի արեւելյան եւ արեւմտյան հարեւանները իրենց տիրապետության տակ անցած տարածքներում՝ Արեւմտյան Հայաստանում, Նախիջեւանում ու Արցախում, նոր ոգեւորութեամբ եւ թափով շարունակում են հայկական նյութական մշակույթի դարավոր պատմությունն ունեցող հուշարձանների միտումնավոր եւ համակարգված ոչնչացումը: Յավալիորեն երբեմն անգամ մարում են այս հուշարձանների վերաբերյալ եղած հիշողությունները, ավանդություններն ու ժողովրդական հավատալիքները: Սակայն պատմությունն ինքը, թերեւս չհամակերպվելով դեպքերի նման ընթացքին, ժամանակ առ ժամանակ երեւան է հանում այնպիսի փաստեր ու վկայություններ, որոնք ստիպում են որոնել, փնտրել ու մոռացության քողից ազատել դեպքերն ու դեմքերը, որոնք մի ժամանակ այնքան կարեւոր դեր ու նշանակություն են ունեցել մեր հոգեւոր, մտավոր ու ֆիզիկական հայրենիքում:

Ստորեւ ներկայացվող ուսումնասիրության նյութը դիպվածով

^{1*} Ստացվել է՝ 22.05.2025, գրախոսվել է՝ 24.05.2025:

Էլ. հասցե՝ tatevm0505@gmail.com knarbanaser@gmail.com: Հետազոտությունն իրականացվել է ՀՀ ԿԳՄՄՆ Բարձրագույն կրթության եւ գիտության կոմիտեի տրամադրած ֆինանսավորմամբ՝ 25RG-6A078 ծածկագրով գիտական թեմայի շրջանակում:

գտնված նման մի պատմական վկայությունն է, որը տարիներ շարունակ պահվել է Հայաստանի պատմության թանգարանում:

**ՀԱՅԱՍՏԱՆԻ ՊԱՏՄՈՒԹՅԱՆ ԹԱՆԳԱՐԱՆԻ ՀՆԱՏԻՊ ԳՐՔԵՐԻ
ՀԱՎԱՔԱԾՈՒՆ ՈՒ Հ^Մ 352 ԿՈՆԴԱԿԸ**

Հայաստանի պատմության թանգարանի (այսուհետ՝ ՀՊԹ) հնատիպ գրքերի պահպանում գրքերի հետ հաջորդական համարակալմամբ պահվում են հայերեն ձեռագրեր եւ պատառիկներ, որոնք թ.ից սկսած թանգարանը ձեռք է բերել 1921 տարբեր անձանցից: Մինչեւ վերջերս ՀՊԹ հայերեն ձեռագրերի մասին միակ տպագիր աղբյուրը Օննիկ Եգանյանի 1984 թ. «Յուցակ հայերեն ձեռագրաց ՀՍՍՀ Պետական պատմական թանգարանի» հրապարակումն էր՝ «Բանբեր Մատենադարանի» հանդեսում²: Հրապարակման մեջ Օ. Եգանյանը ներկայացնում է 4 ձեռագիր (հ^Մ 692 Ավետարանը, հ^Մ 592 Տոնացույցը, հ^Մ 741 Ժողովածուն, հ^Մ 693 Բառգիրքը) եւ հնատիպ գրքի կազմում գտնվող մի հիշատակարան:

Թույլտվություն ստանալով աշխատել թանգարանի հնատիպ գրքերի պահպանում՝ պարզեցինք, որ թանգարանի ձեռագիր մատյաններն ավելի շատ են, քան ներկայացված է հոգվածում, եւ 2023–2024 թթ. պարբերական այցերով ձեռնամուխ եղանք դրանց ուսումնասիրմանը³: Արդյունքում ստացվեց, որ թանգարանում պահվում են ԺԵ.–ԺԹ. դարերի 51 հայերեն ձեռագրական միավոր, որոնցից 25-ը՝ ամբողջական ձեռագիր, 25-ը՝ պատառիկ, եւ 1-ը՝ կոնդակ: Վերջինս կտորի վրա սոսնձված 137,5 սմ երկարությամբ եւ 24 սմ լայնությամբ թղթի գալարածեւ փաթեթ է, որը նախիր ձեւով, ապա եւ բովանդակությամբ գրավեց մեր ուշադրությունը:

Կոնդակը գրանցված է 352 համարի ներքո: Ըստ թանգարանի Գլխավոր մատյանի տեղեկությունների՝ այն ստացվել է 1921 թ. (ավելի ստույգ՝ գրանցված է 1921 թվականից հետո ստացված նյութերի մեջ), եւ հայտնի չէ այն հանձնող մարդու անունը:

² Օ. ԵԳԱՆՅԱՆ, Յուցակ հայերեն ձեռագրաց ՀՍՍՀ Պետական պատմական թանգարանի, «Բանբեր Մատենադարանի», 1984, հ^Մ 14, էջ 251–275: Հմմտ. B. COULIE, Armenian Manuscripts, Catalogues, Collections, Libraries, Turnhout, Brepols, 2020, էջ 387–388:

³ Աշխատանքի արդյունքը հոգվածի ձեւով ներկայացված է տպագրության «Աշխատություններ Հայաստանի պետական թանգարանի» պարբերականում: Ուսումնասիրությունը կատարելու թույլտվության, աշխատանքային բոլոր հարցերում լիակատար աջակցության եւ համագործակցության համար շնորհակալ ենք ՀՊԹ աշխատակիցներին:

Կոնդակը գրված է բոլորգրով, կարմիրով սահմանագծված գրադաշտում: Վերին 26 սմ երկարությամբ եւ 23 սմ լայնությամբ հատվածի վրա պարզ ու անվարժ նկարչությամբ պատկերված են ս. Գեւորգը ձիու վրա՝ վիշապին խոցելիս, եւ մի վանք, որի զանգակատան վրա կանգնած է աքաղաղ (նկար 1): Նկարն արված է սեւ թանաքով, հավանաբար հետագայում ս. Գեւորգի լուսապսակը, աքաղաղը եւ վիշապի թեւերը ներկված են մանուշակագույն թանաքով: Կոնդակն սկսվում է թռչնագիր «Ի» տառով, որը 17 տողի չափով դեպի ներքեւ է իջնում (նկար 2): Այն գունավորված է կարմիր եւ կապույտ գույներով: Կոնդակը գրված է սեւ թանաքով, միայն առաջին 2 տողը եւ որոշ նախադասությունների սկզբնատառեր՝ կարմիրով: Կոնդակը մեզ է հասել ամբողջությամբ, միայն վերին՝ պատկերազարդ մասն է վնասված, տեղ-տեղ մինչեւ 8 սմ չափով պատռված: Պատռվածքներ կան նաեւ կոնդակի աջ լուսանցին: Գրադաշտին կան մոմի կաթիլից սեւացած—այրված հետքեր, ցեցի անցքեր, լուսանցին՝ մատնահետքեր: Զախ լուսանցում կա սեւ թանաքով ութանկյուն կնքադրոշմ՝ «ՔՐԻՍՏՈՍԻ ԾԱՌԱՅ / ՄԱՐՏԻՐՈՍ / ՎԱՐԴԱՊԵՏ» գրությամբ (նկար 3):

Կոնդակը Փութկու Ս. Գեւորգ վանքից է՝ գրված Աբրահամ վարդապետի ձեռքով: Այն սկսվում է ողջույնի եւ օրհնության խոսքով՝ ուղղված կոնդակին հանդիպող բոլոր անձանց՝ եկեղեցականներին, երեսփոխաններին, իշխաններին, վաճառականներին, մեղիքներին, մահտեսիներին, արհեստավորներին, հողագործներին, արանց ու կանանց, ծերերին ու երիտասարդներին: Մի ամբողջ պարբերությամբ ներկայացվում են սուրբ Գեւորգ Զորավարի սքանչելագործությունները, ապա ծանուցվում է սուրբի անվամբ կառուցված Փութկու հռչակավոր ուխտի, նրա՝ Մոկաց լեռներում ճանապարհորդների համար օթեւան լինելու մասին: Քանի որ վանքն անվճար է հոգում բոլոր օթեւանողների ծախսերը եւ չունի ո՛չ արտեր, ո՛չ դաշտեր, ո՛չ եկամուտի որեւէ աղբյուր, ապա սույն կոնդակը հորդորում է հավատացյալներին ողորմությամբ օգնել ու աջակցել:

Կոնդակը չունի թվական եւ որեւէ այլ տեղեկություն:

ՀՊԹ-Ի Հ^Մ 352 ԿՈՆԴԱԿԸ

ԵՒ ՓՈՒԹԿՈՒ ՍՈՒՐԲ ԳԵՒՈՐԳ ՎԱՆՔԸ

Փուլկու Սուրբ Գեորգ վանքը ԺԹ. դարում բավականին նշանավոր էլ մեծ ժողովրդականություն վայելող վանք էր Արեւմտյան Հայաստանի Վանի նահանգի Վանի գավառի Մոկս գավառակում⁴: Մոկսն Աղթամարի կաթողիկոսության թեմերից էր, եւ Աղթամարին էր պատկանում նաեւ Ս. Գեորգ վանքը⁵:

Այսօր վանքն ամայացած ու քանդված վիճակում է⁶ (նկար 4–6)⁷:

Բարեբախտաբար մեզ են հասել Փուլկու Սուրբ Գեորգ կամ Սարի Սուրբ Գեորգ վանքի մասին ձեռագրական տեղեկություններ, ականատեսների՝ աղբյուրագիտական արժեք ստացած փաստագրված վկայություններ եւ դրանց հիման վրա գրված ակնարկներ ու ուսումնասիրություններ⁸:

Ըստ այդ ուսումնասիրությունների՝ Փուլկու վանքի հիմնադրման հստակ ժամանակն անհայտ է, սակայն ոմանք այն կապում են Արծրունյաց իշխանության տարիների հետ⁹: Ձեռագիր աղբյուրների քննությունը

⁴ Թ. ՀԱԿՈՐՅԱՆ, ՍՏ. ՄԵԼԻՔ-ԲԱԽՇՅԱՆ, Հ. ԲԱՐՍԵՂՅԱՆ, Հայաստանի եւ հարակից շրջանների տեղանունների բառարան, հտ. 5, Երեւան, Երեւանի համալսարանի հրատարակչություն, 2001, էջ 282–283: Քրիստոնյա Հայաստան հանրագիտարան, Երեւան, Հայկական հանրագիտարանի գլխավոր խմբագրություն, 2002, էջ 756–757: ՍՏ. ՄԵԼԻՔ-ԲԱԽՇՅԱՆ, Հայոց պաշտամունքային վայրեր, Երեւան, ԵՊՀ հրատարակչություն, 2009, էջ 411–412:

⁵ ՏՆՎ Վ. ՎԱՐԴԱՆՅԱՆ, Աղթամարի կաթողիկոսության պատմություն, Ս. էջմիածին, Մայր Աթոռ Սուրբ էջմիածին հրատարակչություն, 2017, էջ 247: Ն. ՏԵՐԿԱՆՅԱՆ, Ժամապարհորդություն Բարձր Հայք եւ Վասպուրական 1872–1873 թթ., Երեւան, Հայաստանի ԳԱ հրատ., 1991, էջ 226–227:

⁶ Եղեռն՝ եղեռնից հետո, հտ. Ա, Երեւան, Հայկական ճարտարապետությունն ուսումնասիրող հիմնադրամ, 2015, էջ 244–245: Համաձայն այս գրքի տեղեկությունների՝ Փուլկու Սուրբ Գեորգ վանքը՝ եկեղեցիով եւ օժանդակ կառույցներով մինչեւ 1980-ական թթ. կանգուն է եղել եւ ծառայել է իբրեւ կացարան քրդերի համար. «2006 թ. պարզվեց, որ արդեն մեկ տասնամյակից ավելի է, ինչ վանքը վերածվել է գանձախույզների բռնի գործունեության վայրի եւ զգալի չափով ավերվել» (էջ 244):

Փուլկու Ս. Գեորգ վանքի նկարներից մեկն էլ տե՛ս «Յուշամատեան» կայքում՝ https://www.houshamadyan.org/fileadmin/_processed_/6/3/csm_ZAS4515_retouche_web_76f0e40d69.jpg (15.05.2025):

⁷ Նկարները տրամադրելու համար խորին շնորհակալություն ենք հայտնում Հայկական ճարտարապետությունն ուսումնասիրող (ՀՃՈՒ) հիմնադրամին:

⁸ Նպատակ շուեննալով տալ վանքի մասին եղած աղբյուրների եւ ուսումնասիրությունների մատենագիտություն՝ քննության կառնենք միայն մեր կոնդակի հետ որոշ չափով կապվածները՝ մյուսներին անդրադառնալով ըստ պատեհի:

⁹ ՏՆՎ Մ. ՀԱՍՐԱՔՅԱՆ, Մոկսից Ս. Գեորգ վանքը, «Քրիստոնյա Հայաստան հանրագիտարան», Երեւան, Հայկական հանրագիտարանի գլխավոր խմբագրություն, 2002, էջ 756, Ուս-

ցույց է տալիս, որ ԺԴ. դարում այն եղել է գիտական ու գրչության կարեւոր կենտրոն¹⁰: 1601 թ. Ստեփաննոս եպիսկոպոսի նախաձեռնությամբ վանքը նորոգվել է¹¹: Հաջորդիվ տեղեկություններն արդեն ԺԹ. դարից են՝ հիմնականում տարբեր տեղագրական եւ ուղեգրական բնույթի գործեր, վանքերի ու ժողովրդական հավատալիքների մասին ուսումնասիրություններ եւ այլ առիթներով անդրադարձներ վանքին:

Սրանցից ժամանակագրորեն առաջինը թերեւս ԺԹ. դարասկզբին տպագրված Ղ. Ինճիճյանի «Աշխարհագրութիւնն» է¹², որտեղ Վանի հարավ արեւմտյան վանքերի մեջ հիշված է նաեւ «Բութկու Սուրբ Գորգ կամ Սուրբ Գէորգ»-ը իբրեւ խոր ձորում գտնվող մի մենաստան՝ հռչակավոր՝ եղանակի վերաբերյալ գուշակություններ անող իր աքաղաղով¹³:

Վանքի մասին փոքրիկ, սակայն բավականին կարեւոր մի տեղեկություն ենք հանդիպում 1865 թ. Գարեգին Սրվանձտյանցի խմբագրած «Արծուիկ Տարօնոյ» պարբերականում (Մուշ, Տարօն). «Աղթամարայ վիճակ. Փութկու կամ Պուտկու Ս. Գէորգի վանք կայ: Նոյնպէս եւ Վանոյ Առաջնորդի թէմը Տիրամօր վանքը: Երկուքն ալ հռչակաւոր եւ հրաշալի վանքեր են, երկուցն ալ աշխարհակամներ կտիրեն (ընդգծումը մերն է.— Մ. Տ. եւ Հ. Ք.): Փութկու վանից երեսը ամեն տարին 20 կամ 25 000 ղշի կառնուն Աղթամարայ կաթողիկոսէն ծախու եւ վանքի բոլոր եկամտից կտիրէ այն երես առնող աշխարհական մը. ուխտաւորներէ շատ արդինք եւ խոստմունք կ'գոյանայ. նաեւ տարին բոլոր ժողովարարներ (ընդգծումը մերն է.— Մ. Տ. եւ Հ. Ք.) ունի աշխարհական կարգէ, որք վիճակներ կշռջին կժողովեն խոստունքներ, մատաղներ եւ այլն»¹⁴: Ուրեմն՝ 1860-ական թթ. վանքը գտնվում էր աշխարհիկ անձանց կառավարման ներքո. ամեն տարի որեւէ մեկը Աղթամարից 20 000—25 000 ղուռուշով գնում էր վանքի եկամուտները տնօրինելու

տանիկեան, «Արեւելք», 1887, թ. 1143՝ ըստ Հ. ՈՍԿԱՆԻ «Վասպուրական-Վանի վանքերը» աշխատության (մաս Գ., Վիեննա, Միխիթրեան տպարան, 1947, էջ 889):

¹⁰ Տէս Ա. ՄԱԹԵՒՈՍՅԱՆ, Մոկաց Սարի Ս. Գեւորգ վանքի գրչության կենտրոնը XIV–XV դարերում, «Բանբեր Մատենադարանի», 1962, հոմ 6, էջ 197–218:

¹¹ Տէս Մ. ՀԱՍՐԱԹՅԱՆ, Մոկաց Ս. Գեւորգ վանքը, «Քրիստոնյա Հայաստան հանրագիտարան», Երեւան, 2002, էջ 756:

¹² Ղ. ՎՐԴ. ԻՆՃԻՃԵԱՆ, Աշխարհագրութիւն չորից մասանց աշխարհի՝ Ասիոյ, Եւրոպիոյ, Ափրիկոյ եւ Ամերիկոյ, Մասն առաջին, Ասիա, հտ. Ա., Վէնէտիկ, 1806:

¹³ Տէս նույն տեղում, էջ 145:

¹⁴ Արծուիկ Տարօնոյ, 1865, թիւ 36, փետր. 14, էջ 47–48:

իրավունքը: Վանքի եկամուտները գոյանում էին ուխտավորների նվիրատվություններից: Բացի այդ՝ կային նաեւ աշխարհիկ ժողովարարներ, որոնք ամեն տարի շրջում էին տարբեր վայրերով՝ վանքի անունով նվիրատվություններ հավաքելու: Ինչպես կտեսնենք ստորեւ, վանքի աշխարհիկ կառավարիչ-պատասխանատուն կոչվում էր փութկապան: Ընդ որում՝ այս «կոչում»-ով անձնավորություն՝ փութկապանցի մահտեսի Հոհան (Յօհան) արձանագրված է նաեւ 1858 թ. Կ. Պոլսում Աղթամարի կաթողիկոսության խնդրով գումարված Ընդհանուր ժողովում, Հոգեւոր ժողովի պատրաստած պայմանագրի ներքո ստորագրած աղթամարցի 21 միաբանների, քահանաների ու աշխարհականների շարքում¹⁵: Այլ կերպ ասած, փութկապանը եղել է Աղթամարի կաթողիկոսի խնդրով Կ. Պոլսի Հայոց Պատրիարքարան բանակցության մեկնած պատվիրակության կազմում: Մի հետաքրքիր տեղեկություն էլ կա Վիեննայի Մխիթարյան միաբանության հմր 703 ձեռագրում¹⁶, ըստ որի 1839 թ. Աղթամարի կաթողիկոսի հանձնարարականով ոմն Հովհաննես մահտեսի գալիս է Կ. Պոլիս՝ Հայոց Պատրիարքարան, եւ տեղեկացնում, որ մի քուրդ, վանահորը սպանելով, տիրացել է վանքին: Արդյո՞ք ձեռագրում նշված է վանահայր, կամ վանահայր ասելով պետք է հասկանալ հոգեւորական վանահորը, թե փութկապանին, դժվար է այժմ ասել՝ առանց ձեռագրի ու լրացուցիչ քննության:

Երեմիա Տեւկանցը իր ուղեգրության մեջ հայտնում է, որ 1850 թ. Վանի առաջնորդ Գաբրիել եպիսկոպոսը Մոկսում դպրոց է բացում եւ «Փութկի սուրբ Գեւորգ վանքի 30 000 դուրուշէն ամսական կապեց վարժապետին»¹⁷: Գաբրիել եպիսկոպոսի մահվանից հետո Աղթամարի միաբանները չհոգացին դպրոցի մասին. «Աղթամարցիք ազգ խաբելով Փութկի մուխաթան իւրացուցին, որ Երուսաղէմի Սուրբ Յակոբայ վանքի դպրոցի նման մի ուսումնարան բանալով վիճակին ուսումնական քահանայ եւ վարժապետ հասուցանէին, սակայն 18 տարի մուխաթան առնելէն յետոյ տեղա-

¹⁵ Տէս Մ. ԻԶՄԻՐԼԵԱՆ, Հայրապետութիւն Հայաստանեայց առաքելական սուրբ եկեղեցւոյ եւ Աղթամար ու Սիս, Կ. Պօլիս, տպագր. Զարդարեան, 1881, էջ 411: Բացի ստորագրելուց՝ փութկապանցի մահտեսի Հոհանը պայմանագիրը վավերացրել է իր կնիքով (21 անգամից միայն 5-ն են բացի ստորագրությունից նաեւ կնքել պայմանագիրը):

¹⁶ Տեղեկությունը բերում ենք ըստ Հ. Ոսկյանի. տէս Հ. ՈՍԿՅԱՆ, նշ. աշխ., էջ 892:

¹⁷ Հմմտ. ԵՐ. ՏԵՒԿԱՆՅ, Ճանապարհորդություն Բարձր Հայք եւ Վասպուրական 1872–1873 թթ., Երեւան, Հայաստանի ԳԱ հրատ., 1991, էջ 227:

պահ Յակոբ եպիսկոպոս 2 տարի առաջ մի դպրոց բացաւ Աղթամարայ մէջ...»¹⁸, որն էլ շատ կարճ կյանք ունեցավ:

ԺԹ. դարավերջին եւս վանքի մասին պատմութիւնները եւ նրա հետ կապված հավատալիքներն արձանագրել են ճանապարհորդներն ու բանահավաքները: Վանքը հիշատակվում է որպէս իշեւանատուն բոլոր ճանապարհորդների համար, ովքեր Վանից Մոկս գնալու ճանապարհին անցնում էին Եղբորով լեռան միակ՝ դժվարամատչելի ճանապարհով: Այսպէս, ըստ Գարեգին Սրվանձտյանցի Փոլիկո Ս. Գեւորգը «այս կողմերի Ս. Բեռնարդոսն է, միակ ապաստարան ուղեւորաց, բուքերու եւ փոթորիկներու երեսէն. հռչակաւոր իւր աքաղաղով»¹⁹: Նրա գրառումներում, ճիշտ ինչպէս դարասկզբին Ղ. Ինճիճյանն էր նշել, աքաղաղը գուշակում է եղանակը. «երբ նա խօսի, ուղեւորները կը վստահին ճամբայ ելլելու. երբ օդը վտանգաւոր թուի, քանի մ' օր բոլորովին անխօս կը մնայ եւ այլն»²⁰:

Մեկ այլ նմանատիպ վկայութիւն կա «Արձագանք»-ի (Թիֆլիս) 1882 թ. 13-րդ համարում²¹: Հոգվածագիր Ղ. Նահապետյանը, հիմնվելով Ողմա գյուղի ծերերի պատմածների վրա, հայտնում է, որ Ս. Գեւորգի մասունքը նախապէս պահվել է Բեդար գյուղատեղիի Ս. Գեւորգ եկեղեցում: Երբ հայերը գաղթել են գյուղից, մասունքը մեկ օրվա հեռավորութեամբ Մոկաց արեւելյան կողմում՝ Աղբորով (Եղբորով) լեռների մէջ Փոլիկի Ս. Գեւորգ վանքում են ամփոփել²²:

ԺԹ. դարի վերջին Սարի Սուրբ Գեւորգ վանքի մասին անհավանական պատմութիւնները (անհամար ոչխարի հոտի, նախրի պահապան գայլերի ու վանահայր «խօրօզ»-ի մասին) ոչ միայն հրապարակումներով, այլեւ բանավոր կերպով են հասել Արեւելյան Հայաստանի տարածք եւ ապա հայտնվել մամուլում²³:

¹⁸ Նույն տեղում:

¹⁹ Գ. ՍՐՎԱՆԶՏՅԱՆ, Համով-հոտով, Երկեր, հտ. 1, Երեւան, Հայկական ՍՍՀ ԳԱ հրատարակչութիւն, 1978, էջ 402: Նույնը՝ Համով-հոտով, Կ. Պոլիս, տպագր. Գ. Պաղտատեան (Արամեան), 1884, էջ 89:

²⁰ Գ. ՍՐՎԱՆԶՏՅԱՆ, Գրոց ու բրոց եւ Սասունցի Դավիթ կամ Մհերի դուռ, Երկեր, հտ. 1, Երեւան, Հայկական ՍՍՀ ԳԱ հրատարակչութիւն, 1978, էջ 75: Նույնը՝ Գրոց ու բրոց եւ Սասունցի Դավիթ կամ Մհերի դուռ, Կ. Պոլիս, տպագր. Ե. Մ. Տնտեսեան, 1874, էջ 106:

²¹ Ղ. ՆԱՀԱՊԵՏՅԱՆ, Բարվարա տուն, «Արձագանք», 1882, հմր 13, էջ 200–201:

²² Նույն տեղում, էջ 200:

²³ 1885 թ. «Նոր Դար» թերթի (Թիֆլիս) 25-րդ համարում «Գիւղացւոց նախապաշարմունքները եւ անհաւատութիւնները» հոդվածում (էջ 1–2) հիշատակվում է Դահարլու (այժմ՝ Գետք) գյուղ եկած մի թափառականի պատմութիւն Սարի Սուրբ Գեւորգի հրաշքների մասին:

1892 թ. Թիֆլիսում հրատարակված «Փշրանքներ ժողովրդական բանահիւսութիւնից» ժողովածուի մեջ Գարեգին Հովսեփյանը ներառում է նաեւ Մոկացի Հովանի (Յեովան) պատմած «Սարի Սըփ Գէվորք» ավանդությունը՝ կապված վանքի հիմնադրման, անվան²⁴ եւ գուշակ աքաղաղի հետ²⁵:

Վանքի, հատկապէս նրա տնտեսական դրության մասին նոր տեղեկություն ենք գտնում Խաչիկ Լեւոնյանի²⁶ հոդվածում²⁷: Նա հաղորդում է, որ վանքը «հիմա բոլորովին կորուսած է իր ճոխութիւնը: Թէպէտ տնտեսական երաշտութենէն առաջ արդիւնաբերութեան կողմէ առաջինն էր մէկ երկու աշխարհական վանահայրերու ձեռքին ներքեւ, որք տարեկան իբր 30–40 հազար դահեկան վճարելով Աղթամարայ իբրեւ կապալառուներ, անոր ամբողջ տարուան հասոյթները կը դարձնէին երկրին ամեն կողմերը պտտելով, որ շատ անգամ 80–100 000 դահեկանի կ'հասնէր»²⁸: Իսկ արդեն «Բիւզանդիոնի» (Կ. Պոլիս) 1903 թ. համարներում²⁹ նա ավելի մանրամասն է ներկայացնում վանքը՝ իբրեւ ականատես, որ ճանապարհորդության ընթացքում եղել է Փութկու Ս. Գեորգ վանքում:

Ըստ նրա վանքում ապաստանող ճանապարհորդները երբեմն այնքան շատ էին, «որ շատ անգամ օրական 50-է աւելի հաց ուտողներ կըլլան հոն... որ օրերով հոն օթեւանելու կը ստիպուին՝ օգերու խառնակութեանց պատճառով»³⁰: Պատմում է նաեւ աքաղաղի, նրան ընտրելու եւ թաղելու

²⁴ Վանքի անվան մասին եղած բոլոր վկայություններն ու բացատրությունները ի մի է հավաքել Հ. Ոսկյանը «Վասպուրական-Վանի վանքերը» աշխատության մեջ (մաս Գ., Վիեննա, Մխիթարեան տպարան, 1947, էջ 884–892): Քանի որ վանքի անվան բացատրությունը կապված չէ մեր հոդվածի բուն խնդրի հետ, այդ հարցի ներկայացումը դուրս կ'թողնենք հետագա շարադրանքից, եթե անգամ մեր քննության մեջ հիշատակվող ուսումնասիրողներն անդրադարձած լինեն դրան:

²⁵ Գ. ՅՈՎՍԷՓԱՆՅԱՆ, Փշրանքներ ժողովրդական բանահիւսութիւնից, Թիֆլիս, տպարան Մ. Շարաձէ, 1892, էջ 38–46:

²⁶ Խաչիկ, Խաչատուր Լեւոնյան – Վանի Աղջկանց վարժարանի տնօրէն, հեղինակ, հնագետ, տէս Խ. ԼԵՒՈՆՅԱՆ, Վան-Վասպուրական աշխարհը, հատորը կազմեց, խմբագրեց եւ ծանոթագրեց Եր. Քասունի, Պէյրուս 2013, էջ 6:

²⁷ Խ. ԼԵՒՈՆՅԱՆ, Աղթամարայ կաթողիկոսները սկզբէն ցվերջ, «Բիւզանդիոն», 1900, հ^ր 1194, էջ 1:

²⁸ Նույն տեղում:

²⁹ Խ. ԼԵՒՈՆՅԱՆ, Նարեկայ վանքէն դէպ Առբերդոյ Ս. Աստուածածնի վանք եւ Եղերով լեռ, «Բիւզանդիոն», 8–21 հոկտ., 9–22 հոկտ., 10–23 հոկտ., 1903, թիւ 2148, 2149, 2150: Նույն վերնագրով արտատպված տէս Խ. ԼԵՒՈՆՅԱՆ, Վան-Վասպուրական աշխարհը, հատորը կազմեց, խմբագրեց եւ ծանոթագրեց Եր. Քասունը, Պէյրուս 2013, էջ 92–102:

³⁰ Խ. ԼԵՒՈՆՅԱՆ, նշ. աշխ., էջ 96–97:

կարգերի մասին³¹։ Թե՛ նախորդ, թե՛ այս հոդվածում նա նշում է, որ վանքը կառավարում է Աղթամարի ընտրած-որոշած «աշխարհական վանահայր»՝ «փութկապան»-ը. «Ներկայիս մէջ այս վանքը կորուսած ըլլալով իր նախկին բարոյական հանգամանքը, իսպառ զուրկ է եկեղեցական միաբանութենէ, կառավարուելով Աղթամարայ կողմէն որոշուած աշխարհական վանահօր մը միջոցաւ, որ «փութկապան» կը կոչուի, ունենալով իր ձեռքին տակ տասնէ աւելի մշակ ու հօտաղներ եւ տնտեսուհիներ»³²։

Հստ այս հոդվածի՝ փութկապանը տարբեր վայրերից վանքին խոստացված նվիրատվությունները հավաքելու արտոնությունը վաճառում է կապալառուներին, որոնք, 1000–10 000 դուռուշ խոստանալով վանքին, մի կոնդակ եւ մի խաչ վերցրած շրջում են տարբեր վայրերով՝ հավաքելով հասույթը։ «...փութկապանն երկրին իւրաքանչիւր սահմաններուն արդիւնքները ծախսու կը հանէ, զոր կապալառուներ 1000-էն մինչեւ 10 000 դշ.ի գումար մը խոստանալով անոր, կը գնեն իւրաքանչիւր մէկ կամ երկու գաւառներուն արդիւնքները, եւ այսպէս այդ կապալառուները՝ իբրեւ տեսակ մը խաչագողեր՝ կոնդակ մը (ընդգծումը մերն է. – Մ. Տ. եւ Հ. Ք.) ու խաչ մը հետերնին առած՝ պտոյտի կելնեն իրենց պատկանեալ սահմանները, ու մինչեւ իսկ արտասահման, ժողվելու այն խոստացուած նուէրներն եւ ուրիշ պատահական հասույթներն եւ անոնցմէ փութկապանին խոստացուած կապալառուական վարձքն իրեն վճարելէն յետոյ, ինչ որ աւելնայ այն գումարէն, իրենց կը պատկանի»³³։

Մինչ այժմ բերված աղբյուրներից Խ. Լեւոնյանի այս հոդվածը մեզ համար կարեւոր է կոնդակի մասին հիշատակումով եւ դրա գործառույթի վկայությամբ։ Փաստորեն, այն վանքի աշխարհական վանահայրը շնորհում էր կապալառուներին՝ նվիրատվություններ ժողովելու նպատակով։ Վանքը, ինչպես արձանագրել էր դեռեւս Գ. Սրվանձտյանցը 1865 թ., չու-

³¹ Երբ այս աքաղաղը ծերանում է, միաբաններից մեկը երազի միջոցով իմանում է հաջորդ աքաղաղի գտնվելու վայրը։ Այս միաբաններից 2-ը զարդարուն վանդակով գնում եւ բերում են նոր աքաղաղին։ Ասում են՝ իբր հին աքաղաղը, նորին տեսնելով, «սրտին կսկիծէն ծիրելով կը մեռնի», եւ նրան կես քահանայաթաղով որոշված մի տեղում թաղում են։

³² Նույն տեղում, էջ 97։

³³ Նույն տեղում, էջ 97. «Այս անխիղճ ու աներես կապալառուներէն ոմանք օգտուելով տգէտ ժողովրդեան միամտութենէն, անոնցմէ աւելի արդիւնք քաշելու նպատակաւ կը ջանան երբեմն նախապաշարել զանոնք ըսելով, թէ՛ Սբ. Գէորգի զօրութեամբ՝ վանուց մէջ գտնուած ուռնիները նուռ յառաջ կը բերեն, թէ՛ վանքին ոշխարներն առանց հովիւի արածուելու կ'երթան եւ կ'թուելու ատեն ինքնին բերատեղ կու գան, թէ՛ անոր մաքիները զոյգ զոյգ կը ծնին եւն»։

ներ եկեղեցական միաբանությունն եւ կառավարվում էր Աղթամարի որոշած «աշխարհական վանահոր»՝ փութկապանի միջոցով:

Մեր ունեցած կոնդակը եւս վանքի համար միջոցներ հավաքելուն է ուղղված: Սակայն կոնդակը գրված է Աբրահամ վարդապետի անունից: Սա նշանակում է, որ կամ կոնդակը գրվել է այն ժամանակ, երբ դեռ ուխտը ուներ հոգեւորականներ, այսինքն՝ փութկապաններից առաջ, կամ գրվել է փութկապանների օրոք, Աղթամարից լիազորված որեւէ վարդապետի ձեռքով: Թե որքան ժամանակ է վանքը «խալառ զուրկ» եկեղեցական միաբանությունից, հոգվածը չի հայտնում (մեզ չհաջողվեց գտնել որեւէ տեղեկություն այս մասին այլ աղբյուրներում), ուստի եւ չենք կարող որոշել մեր կոնդակի գրության ժամանակահատվածը: Հատկապես որ վանքի եւ աքաղաղի համբավը Ղ. Ինճիճյանն արձանագրել է դարասկզբին՝ Խ. Լեւոնյանի հոգվածից 100 տարի առաջ, իսկ դա բավականին ժամանակ է, որպեսզի վանքը սկզբում ունենար, ապա չունենար հոգեւորականություն:

Փութկու Ս. Գեւորգ վանքը հիշատակվում է 1902 թ. Գեւորգ Շերենցի տպագրած «Սրբավայրեր» գրքում³⁴: Գ. Շերենցը Մոկաց գավառի սրբավայրերն սկսում է «Փութկու-փոթրկի ս. Գէորգայ վանք»-ով, գլխավորապես ներկայացնում է վանքի՝ իջեւանատուն լինելը բոլոր ճանապարհորդների համար՝ անկախ ազգությունից: Ըստ նրա վանքը չունի ո՛չ վարելահողեր, ո՛չ գյուղատնտեսական միջոցներ, գլխավոր եկամուտը շրջուն կապալառուների աշխատանքից հավաքվող արդյունքն է, որոնք նախապես սակարկում են Աղթամարի վարչության հետ որոշ գումարով. «Այդ կապալառուները վերցնելով վանքից մի ինչ մասունք կամ խաչ, շրջագայում են երկրէ երկիր եւ հաւաքում են նպաստները, ողորմութիւն ամեն տեսակ արմտիքից, գառ ու ոչխարից, եւ այլն. պատահում է որ քրդերն էլ շատ անգամ մասնակցում են՝ տալով իրենց աննշան զաքաթն (նուէր)...»³⁵: Արդյո՞ք «մի ինչ մասունք» ասելով՝ Գ. Շերենցը նկատի ունի կոնդակը, տեղյակ է դրա մասին, թե՛ ոչ, մնում է անհայտ:

³⁴ Գ. ՇԵՐԵՆՑ, Սրբավայրեր. Տեղագրութիւն Վասպուրականի-Վանայ նահանգի գլխաւոր եկեղեցեաց վանօրէից եւ ուսումնարանաց, Թիֆլիս, տպարան ընկ. «Վարիչ եւ Կամենմախէր», 1902:

³⁵ Նույն տեղում, էջ 132:

Կոնդակի մասին հիշատակում կա 1909 թվականի «Ազատամարտ» թերթում (Կ. Պոլիս) տպագրված Վ. Փափազյանի «Աղթամարի խնդիրը եւ քննիչ յանձնաժողովի տեղեկագիրը» հոդվածում: Քննադատելով Աղթամարի վանքերի ներկա դրությունը եւ պատասխանատուներին՝ հոդվածագիրը օրինակ է բերում նաեւ Փուլիկի հռչակավոր Ս. Գեւորգ վանքը, որ «ժամանակ մը կը շահագործուէր քիւրտ պէյի մը կողմէն... շատ չնչին վարձատրութեամբ մը, իսկ քանի մը տարիներէ ի վեր՝ յանձնուած է Շահէն անունով շատ ճարպիկ Մոկսեցիի մը: Շահէնը «ժողովովք» ընող խաչագողերու խումբ մը ունի, որոնք գարունը բացուելուն պէս՝ կը ցրուին Մուսուլէն սկսած մինչեւ Սիպիր... Անոնց ձեռքը տրուած է «կոնդակներ», որոնց մէջ պատմուած են Փուլիկի Ս. Գեւորգին «հրաշալիքները» թէ՛ ինչպէս Փուլիկին «արջ մը ունի, որ շարունակ իր թոնիրին մօտիւրները կը մաքրէ, վանքին բանջարանոցը կը մշակէ, թէ ինչպէս վանքին ուռի ծառին վրայ խաղող կը բուսնի, թէ ինչպէս վանքին աքաղաղը («դիկը») եթէ հրամայէ, այն ատեն միայն ճամփորդները պիտի վանքէն երթան, թէ ինչպէս վանքին արջն է որ ցորենը ջրաղաց կը տանէ...»³⁶:

Վ. Փափազյանի հոդվածը վանքի նվիրատվությունների հավաքման ու կոնդակի առումով փոքր-ինչ տարբերվում է մինչ այժմ քննած աղբյուրների միանման տեղեկություններից:

Նախ, նա հայտնում է, որ վանքը (թերեւս վանքի եկամուտները կամ դրանց հավաքումը) որոշ ժամանակ քուրդ բեկի ձեռքին էր, սակայն հետո հանձնվում է Շահեն անունով մի մոկսեցու³⁷: Մի կողմ թողնելով հոդվածագրի վերաբերմունքը «ժողովովք» անողներին՝ նկատենք, որ նրանք իրենց ձեռքին ունեն մեզ հետաքրքրող կոնդակները: Այդ կոնդակի՝ հոդվածում չակերտներով թերեւս մեջբերված հատվածը մեր կոնդակում չկա, սակայն հարց է առաջանում.

Ա. արդյո՞ք հոդվածագիրն ուղղակի մեջբերել է կոնդակից. եթե նկատի ունենանք հոդվածագրի անթաքույց վերաբերմունքը հարցին, կարե-

³⁶ Վ. ՓԱՓԱԶՅԱՆ, Աղթամարի խնդիրը եւ քննիչ յանձնաժողովի տեղեկագիրը, «Ազատամարտ», 1909, հ^դ 132, էջ 1:


³⁷ Այն, որ քրդերը սրանից առաջ էլ են փորձել վանքի տնօրինումն իրենց ձեռքն առնել փաստում է Ա. Շահինյանը: Օգտվելով Խ. Լեւոնյանի անտիպ արխիվից՝ նա գրում է, որ Փուլիկու Ս. Գեւորգ վանքը ստանալու պահանջով Մոկաց քուրդ բեկերը 1870 թ. բողոքել են Վանի վայրին, սակայն Վանի Մահմեդ փաշան նրանց պահանջը անիրավացի է համարել (տե՛ս Ա. ՇԱՀԻՆՅԱՆ, Փուլիկու Սուրբ Գեւորգ կամ Սարի Սուրբ Գեւորգ վանքը, «էջմիածին», 1963, հ^դ 11, էջ 60):



Նկ. 1. Կոնդակի նկարագրող վերին հատվածը (լուս.՝ Հայաստանի պատմության թանգարանի)



Նկ. 3. Լուսանցային կնիադրոշմը (լուս.՝ Հայաստանի պատմության թանգարանի)



Նկ. 2. Կոնդակի սկիզբը՝ թռչնագիր գաղափարով (լուս.՝ Հայաստանի պատմության թանգարանի)



Նկար 4. Փութկու Սբ. Գեորգ վանքի հյուսիս-արևելքից (լուս.՝ Արմեն Հախնազարյանի, 1972 թ., Հայկական ճարտարապետությունն ուսումնասիրող (ՀՃՈՒ) հիմնադրամի պատկերադարան)



Նկար 5. Սբ. Գեորգ վանքի ավերակները հյուսիս-արևելքից (լուս.՝ Սամվել Կարապետյան, 2006 թ., Հայկական ճարտարապետությունն ուսումնասիրող (ՀՃՈՒ) հիմնադրամի պատկերադարան)



Նկար 6. Սբ. Գեորգ վանքի ավերակները 2019 թ. (լուս.՝ Սասուն Դանիելյանի, 2019 թ., Հայկական ճարտարապետությունն ուսումնասիրող (ՀՃՈՒ) հիմնադրամի պատկերադարան)

լի է ենթագրել, որ նա կարող էր բանավոր զրույցներով լսածը վերագրել կոնդակի բովանդակությանը:

Բ. Եթե իրոք կոնդակում նման հատված կա, որը բացակայում է մեր կոնդակում, կարող էր լինել կոնդակի մի քանի տեքստ. եթե հոգևածագիրը հայտնում է կոնդակների գոյության մասին, կարելի է ենթագրել, որ դրանք կարող էին մեկը մյուսից արտագրված լինելուց բացի, նաեւ այդպիսին չլինել:

Ամեն դեպքում, կարծում ենք, որ այս հոգևածը կարելու է նրանով, որ ցույց է տալիս նախ վանքի եկամուտների տնօրինման փոփոխությունները՝ եկամտաբեր շահագործման գրավումը քուրդ բեկի կողմից, ապա նորից մոկսեցու ձեռքն անցնելը՝ Աղթամարի գերակայության ներքո: Ապա կարելու է կոնդակի բովանդակության ներկայացումը, որը կարող է եւ բառացի չլինել, սակայն ընդհանուր գաղափարով՝ Փութկի Ս. Գեւորգի «հրաշալիքները»-ը պատմելով, ճշմարտություն պարունակում է:

Շարունակությունը՝ հաջորդիվ

